



Стална делегација Парламентарне скупштине  
БиХ у Парламентарној скупштини Организације  
за европску безбедност и сарадњу

Stalna delegacija Parlamentarne skupštine  
BiH u Parlamentarnoj skupštini Organizacije  
za evropsku sigurnost i saradnju /  
Stalno izaslanstvo Parlamentarne skupštine  
BiH u Parlamentarnoj skupštini Organizacije  
za evropsku sigurnost i suradnju

PARLIAMENTARY ASSEMBLY OF BOSNIA AND HERZEGOVINA  
Delegation to the Parliamentary Assembly of the Organization for Security and Co-operation in Europe

Број/Broj: 01,02,03,03/11-05-97/12  
Сарајево/Sarajevo, 9.5.2012.

**IZVJEŠTAJ  
О УЧЕШЋУ ДЕЛЕГАЦИЈЕ PSBiH У PSOSCE-а У НАДГЛЕДАЊУ ИЗБОРА У  
РЕПУБЛИЦИ СРБИЈИ  
6. маја 2012. године**

Član Delegacije Parlamentarne skupštine BiH u Parlamentarnoj skupštini OSCE-a Lazar Prodanović i sekretar Delegacije Jelena Rajaković, u svojstvu međunarodnih posmatrača u okviru posmatračke misije OSCE-a, učestvovali su u procesu nadgledanja parlamentarnih, predsjedničkih i lokalnih izbora u Srbiji, koji su održani 6. maja 2012. godine.

Tokom boravka u Beogradu članovi posmatračke misije imali su sastanke s predstavnicima DS-a, SPS-a, SNS-a, LDP-a, DSS-a, URS-a i predstavnicima manjina. Na zajedničkom sastanku organiziranom za posmatrače o izbornom procesu u Srbiji govorila je Slavica Đukić-Dejanović, predsednica NSRS-a.

Organiziran je i sastanak s predstavnicima CeSID-a, Republičke izborne komisije, predstavnicima medija i nevladinih organizacija.

U međunarodnoj misiji za posmatranje izbora na teritoriji Srbije bili su predstavnici Parlamentarne skupštine OSCE-a (PSOSCE), Ureda OSCE-a za demokratske institucije i ljudska prava (OSCE/ODIHR) i Parlamentarne skupštine Vijeća Evrope (PSVE).

Oni su u svom saopćenju, izdatom dan nakon održavanja izbora, kazali da su parlamentarni i predsjednički izbori protekli u otvorenom i konkurentskom okruženju, ali da je potrebno uložiti dodatne napore za poboljšanje transparentnosti u izbornom procesu i funkcioniranju medija.

Specijalni koordinator posmatračke misije PSOSCE-a Mateo Mekacci izjavio je da su izbori u Srbiji bili regularni, da su protekli u mirnoj atmosferi, te da su Srbija, njen narod i politička elita učinili značajan napredak ka zreloj demokratiji.

On je dodao da su političke stranke i kandidati izrazili uvjerenje u regularnost izbornog procesa i prihvatali rezultate izbora, te čestitao narodu Srbije. Napomenuo je da je većina kandidata osigurala da građani mogu kvalitetno birati između ponuđenih političkih opcija, a mediji su sa svoje strane osigurali informacije na osnovu kojih se građani mogu opredijeliti. Zaključeno je da je na dan izbora Republička izborna komisija Srbije svoju dužnost obavljala profesionalno. Uočeni su neki proceduralni problemi, ali nije bilo ozbiljnih incidenata.

Mekacci je dodao da je medijsko praćenje izbora moglo da bude ujednačenije, a vlasništvo nad medijima transparentnije, te da je potrebna uravnoteženija i analitička pokrivenost

medijskog prostora. On je pozdravio i stvaranje jedinstvenog biračkog spiska u Srbiji, istaknuvši da je to bio pozitivan korak, ali da je njegova primjena počela kasno, te da su se pri izradi registra pojavili i neki nedostaci u transparentnosti.

Govoreći o predizbornoj kampanji, Mekacci je ukazao da su u fokusu kampanje stranaka bile socijalne i ekonomske teme, što je značajan napredak u odnosu na prošlu kampanju u kojoj je bilo žestokih riječi i sukoba.

Šef posmatračke misije PSVE-a Jean-Charles Gardetto izjavio je da su izbori u Srbiji zadovoljili većinu standarda Vijeća Evrope u vezi s demokratskim izborima, te da su građani imali slobodu izbora između velikog broja stranaka i predsjedničkih kandidata. Kada je u pitanju transparentnost finansiranja kampanje, posmatračku delegaciju raduje izvještaj Agencije za borbu protiv korupcije o ovom pitanju.

On je pozdravio dogovor međunarodne zajednice, Beograda i Prištine o organiziranju parlamentarnih i predsjedničkih izbora na Kosovu.

"Prema mišljenju Vijeća Evrope, pravo na slobodno glasanje je osnovno pravo svakog građanina, bez obzira na to gdje živi", poručio je Gardetto.

Corien Jonker, šef OSCE-ove/ODIHR-ove izborne posmatračke misije, izrazila je zadovoljstvo time što su izbori održani u mirnom okruženju, te istaknula činjenicu da postoji veliko povjerenje u izbornom procesu. Kao ključno izdvojila je potrebu za većom transparentnošću koja bi održala i dalje razvijala to povjerenje, što je neophodno za „živu demokratiju“. U tom procesu građani imaju ključnu ulogu, jer su oni ti koji treba da insistiraju na većoj otvorenosti njihovih institucija.



Izjava o preliminarnim nalazima i zaključcima je rezultat zajedničkog poduhvata OSCE-a/ODIHR-a, PSOSCE-a i PSVE-a.

Izborna posmatračka misija bila je u Srbiji od 4. aprila 2012 . kako bi procijenila da li su izbori u skladu s obavezama OSCE-a, standardima Vijeća Evrope za demokratske izbore, kao i s državnim zakonodavstvom.

Preliminarni nalazi i zaključci dostavljeni su prije završetka izbornog procesa. Konačna ocjena izbora djelimično će zavisiti i od provođenja preostalih faza izbornog procesa, uključujući i objavljivanje rezultata, kao i moguće postizborne pritužbe ili žalbe.

Osam sedmica nakon završetka izbornog procesa OSCE/ODIHR će izdati sveobuhvatan konačni izvještaj, uključujući preporuke za eventualna poboljšanja. PSOSCE-a će predstaviti svoj izvještaj na sastanku Stalnog komiteta u Monaku, 5.7.2012., a Delegacija PSVE-a na sastanku Stalnog komiteta u Tirani, 25. maja ove godine.

Republička izborna komisije Srbije je 10. maja, na osnovu 99,93 % obrađenih biračkih mjesta, proglašila konačne rezultate izbora za parlament, prema kojima je lista Pokrenimo Srbiju - Tomislav Nikolić osvojila 73 mandata u Skupštini Srbije, lista Izbor za bolji život - Boris Tadić 67, a Koalicija SPS-PUPS-JS 44 mandata. Slijede lista DSS, koja je osvojila 21 mandat, lista Preokret s 19 osvojenih mandata, dok je URS osvojio 16 mandata. Savez vojvođanskih Mađara - Ištvan Pastor osvojio je pet mandata, Stranka demokratske akcije Sandžaka - Sulejman Ugljanin dva poslanička mandata, a po jedan mandat liste Sve zajedno i Nijedan od ponuđenih odgovora.

Prema konačnim rezultatima, Koalicija Albanaca Preševske doline dobila je jedan mandat.

Ispod cenzusa ostali su: SRS, Dveri, Reformistička stranka Milan Višnjić, Pokret radnika i seljaka, Socijaldemokratski savez, Crnogorska partija i Komunistička partija.

Protiv izvještaja o konačnim rezultatima parlamentarnih izbora bilo je 12 članova Komisije, i to iz SRS-a, DSS-a, SNS-a, Dveri i Pokreta radnika i seljaka. Za izvještaj je glasalo 20 članova Komisije iz ostalih stranaka.

Iste večeri Republička izborna komisija je proglašila i konačne rezultate izbora za predsjednika Srbije, prema kojima u drugi krug predsjedničkih izbora 20. maja ulaze kandidat koalicije Izbor za bolji život Boris Tadić i kandidat koalicije Pokrenimo Srbiju Tomislav Nikolić.

Prema tim podacima, Boris Tadić je u prvom krugu osvojio 25,31% glasova, odnosno 989.454 glasova, dok je Tomislav Nikolić osvojio 25,05%, odnosno 979.216 glasova. Trećeplasirani na predsjedničkim izborima je Ivica Dačić sa osvojenih 14,23% glasova. Procenat nevažećih glasačkih listića na predsjedničkim izborima bio je 4,47%.

Za izvještaj o konačnim rezultatima predsjedničkih izbora glasalo je 16 članova Republičke izborne komisije. Protiv je bilo 11, i to iz DSS-a, SRS-a, SNS-a, Dveri i Pokreta radnika i seljaka. Kako su kazali predstavnici tih stranaka, glasali su protiv jer je bilo puno nevažećih listića, jer je Komisija dozvolila da Uputstvo o provođenju izbora sadrži odredbe koje ne proizlaze iz Zakona, te zbog razlika u biračkim spiskovima.

Za ove izbore u birački spisak je upisano 6.770.013 lica s pravom glasa, a izlaznost je, prema rezultazima CeSID-a, iznosila 58,7 % birača.

Drugi krug izbora za predsjednika Srbije bit će održan 20. maja 2012. godine

SEKRETAR  
DELEGACIJE PSBiH U PSOSCE-a

Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- članovima Delegacije PSBiH u PSOSCE-a
- Sektoru za međunarodne odnose i protokol

Kopija: Ministarstvo vanjskih poslova BiH

Dostavljen:

- naslovu
- a/a